

奩

史

舊史卷八十九

東吳王初桐子陽纂述

同里曹仁虎習庵校刊

珠寶門二

金銀

女華者桀之愛妾也湯事之以千金

管子

田子爲相三年歸休以金百鎰奉其母母曰不義之物不入于館子慙愧走出自歸于王還金請退就獄王赦田子罪以金賜其母

韓詩外傳

樂羊子嘗行路得遺金一餅還以與妻妻曰君子不

以利汚行羊子慙而棄之

語林

陳皇后退居長門宮愁悶悲思聞司馬相如工文章  
奉黃金百斤爲解愁之辭相如爲作長門賦帝見而  
傷之復得親幸

樂府解題

林慮公主子昭平君尙武帝女夷安公主林慮因病  
以金千斤錢千萬爲昭平君贖死罪

漢書

霍光妻遺淳于衍黃金百兩

西京雜記

應姬見神光照社試探之乃得黃金

後漢書

永康王子婦孫氏見二黃鳥鬥于洗浣石上疾往掩  
取變成黃金及石破內空二鳥處

異苑

韓翃以練囊盛匙金寄柳姬

章臺柳傳

李杲夜坐見一女子從地中出甚美杲曰汝何神何鬼耶女取筆書几上曰許身愧比雙南遂復入地中杲知爲金也掘之得金一筭

嘉蓮燕語

劉寧夫人安氏方飾髮有以瓜盛銀餽者安氏被髮呼僕送還

明語林

有餽金于鄭曉夫人者上覆以茗夫人撥茗見金卽歸之

通言

王修微急人之困揮數千金不惜

許玉斧修微道人  
生錢銘

楊姬少寡鞠一孤年三十不能娶姬百計營聘尙少

數金姬許富家爲賃春乞其直得娶婦婦入門索其姑不見終不肯成禮夫語之故婦泣曰妾囊中金足相當立趣贖姑夫夜馳往蒼猝未特金已而來索婦曰金適已付汝矣夫大詫愕蓋貧家壁皆編葦鄰人竊聞其語詭作其夫取金去也婦羞見給又無餘金痛姑不得贖遂縊死頃明雷擊盜金者死戶外金故在手而孝婦氣絕復甦

學餘堂文集

西王母有金液玉漿

漢武內傳

賈后食金屑而死

晉後畧

楊維禎母李氏夢金鈞自月墜于懷

鐵崖傳

開元宮中有黃色蛇常夜自寶庫中出光彩照灼不可擒捕宮人擲珊瑚玦擊之遂并玦而去掌庫者以告上令徧搜庫內乃得黃金蛇珊瑚玦著其首上曰昔隋煬帝以黃金蛇贈陳夫人不知是否左右因覩領下有廢字蓋煬帝小字阿廢也

杜陽雜錄

梅妃除夕與宮人戲鎔黃金瀉入水中視巧拙以卜來年否泰梅妃一瀉得金鳳一隻首尾足翅無不悉備

膠葛

咸陽公子眷一妓訂盟婚娶臨別贈黃金鴛鴦

瑣窗閑話

有一貧女遊行得一金珠見七賢塔中佛像面上金

色缺壞欲補之爾時迦葉作鍛金師女卽倩令修造  
金師歡喜用補像面因共立願願我二人常爲夫婦  
後托生婆羅門至年十五欲聘妻惟有一女端正殊  
好卽是往日施金女也

法藏經

同昌公主以金銀爲井欄甕鎗之屬

杜陽雜編

忠懿王繼妃俞氏宋太祖時進金銀十餘萬

吳越備史

宮中有娠賜物有金二十四兩八錢七分二釐銀四  
千四百四十兩金銀果子五百個

武林舊事

景泰好色嘗以銀豆金錢洒地令宮人爭拾以供戲

笑

鴻書

有兒丐食于嶽廟一日有婦人挈包而進禮拜甚久  
忘包而出兒取視之皆黃白也藏包以俟見婦人悲  
號來覓兒卽還之婦人以銀一錠酬之兒曰母誤矣  
欲得之不罄所有乎婦曰兒何所依兒曰無依故丐  
耳婦卽攜歸爲夫訴屈夫蓋指揮使指揮無嗣竟以  
此兒承襲祖蔭

白醉瑣言

洪武二十一年賜信國公湯和夫人胡氏黃金二百  
兩白金一千兩

弁山堂別集

黃寅夜讀書聞人扣戶出視之乃雙髻女子微笑而  
言曰我只在西邊住聞君讀書聲歡喜無限寅留坐



卽捻書冊玩誦寅微言挑之畧不羞避遂就寢鶴鳴而去復約再會往還幾半月其所親柳仲恭者拉以入都女子知之俟來告別攜手而泣寅發篋出銀五兩以贈旦而行可二十里見一廟神座傍侍女宛然是所遇者銀在手中初未嘗啟封也

夷堅志

葛佑爲金谿監銀吏熬鍊不成拷掠幾死有二女相與齟齬發誓願以身代父死明日同躍爐中俄有陰雲四起烈風雷雨衆皆驚異卽發爐取其骨已化爲銀矣

說寶

一女巫夢白晳婦人二十七輩皆赭衣前拜曰願伏

事君家自此數夢之後開山得一窖中藏銀三十七錠皆漢裹蹄樣也

諧史

有鬻菜夫鬻荳芽菜一婦人用錢買菜求益夫不與婦人引手其筥取之袖中銀一錠落於其筥夫持歸告妻妻畧不視曰爾得之而喜彼失之者不戚乎立命夫還之

稗史彙編

康保裔母年八十四封陳國太夫人遣內司賓勞問賜白金五十兩

東都事畧

永樂四年賜滿剌國王妃白金二百兩

賞賚考

鄭王賜諸妃白金三萬餘兩

中官考

朱奉濂家一養女有姿色善女紅年可十六七一日  
倦繡停針兀坐忽見一偉丈夫從簷下曰某夙世負  
汝白銀六十餘金今當奉償女卽昏瞶鬼遂竊入女  
腹乃令其女垂簾賣卜剖斷如神每朝所獲止許給  
一日薪水之費餘俱歸女橐幾及三年約足六十金  
之數其鬼乃去扣之亦不靈矣

馬敬菴聞見錄

漢期門郎程偉妻煎水銀成銀

真誥

程偉好黃白術作金不成其妻出囊中藥試之食頃  
便成銀偉驚請傳其術妻曰得之須有命者偉日夜  
說誘終不告乃謀搃持伏之妻曰道必當傳其人得

其人道路相遇輒教之如非其人雖寸斷支解而道終不出也 女世說

元宗取水銀以硃紙重複裹之題封甚密耿先生納於懷中良久忽若裂帛聲元宗起視題處如舊發之已爲銀矣又嘗大雪擁爐索金盆貯雪耿先生取雪削之爲銀錠狀投熾炭中過食頃乃持以出赫然洞赤置之于地爛然盡白錠也而刀痕具在反視其下若垂酥滴乳之狀蓋初爲火所融釋也 耿先生傳

宜春郡民家一日晚有美婦詣門求宿諸婦欣然待之夜深而罷有一子弟心悅之囑其乳母別止一室

夜深潛就之其人身體如冰生大驚命燭視之乃一

銀人重可百斤

玉堂閒話

四川有孝廉公車過陝留宿狹邪以假銀給之入閤恍惚見妓不終塲而罷歸途復經前處隣人告曰自君行後妓以銀付鴇母母識是假怒而扑之身無完膚妓卽投繯死矣

樂郊私語

陸左丞愛女死用水銀殮

樂郊私語

呂生就寢見一姬容服潔白於室之北隅緩步而來漸迫其榻生叱之遂沒生乃以劍置榻下是夕又來生以劍揮之姬忽上榻以臂拱生久之又有一姬上

榻上復以臂堪生生以劍亂揮俄爲十餘姬環走四  
垣俱至榻前翕然合爲一姬與始見者不異生懼甚  
姬笑曰吾來戲君耳非敢害也言畢退于北隅而沒  
明日生于北隅發之得一瓶水銀方悟姬乃水銀精  
也

宣室志

### 錢財

童謠云河間姪女工數錢以錢爲室金爲堂言靈帝  
母永樂太后好聚金錢也

後漢書

館陶公主爲子求郎不許而賜錢千萬

後漢書

王夷甫常嫉其婦貪濁口未嘗言錢字婦欲試之令

婢以錢遶牀使不得行夷甫晨起見錢闔行呼婢曰  
舉卻阿堵物

世說新語

王戎女適裴額貸錢數萬女歸戎色不悅女遽還錢  
乃釋然

世說新語

宋文袁皇后家本貧薄后每就上求錢帛以贈之上  
性儉所得不過錢三五萬帛三五十疋後潘淑妃有  
寵愛傾後宮咸言所求無不得后聞之未知信否乃  
因潘求三十萬錢與家以觀上意宿昔便得因此恚  
恨成疾不復見上上每入必他處回避上數掩伺之  
不能得

南史

海陵城邊海岸崩見一漆棺棺中老姥釵髻衣服及  
枕履悉粲然若新爾夜村人之婦夢見姬云我牆屋  
毀廢骸形飄露今以直一千托爲修治置錢便去明  
覺果得卽用改殮

異苑

有盜其母之錢而逃者請投之四裔太后聞之而怒  
曰豈有無父母之鄉乎于是輟而殺之

前秦錄

封贈綾羅紙價錢宣教郎以下母七貫三百五十妻  
六貫四百五十朝奉大夫遙郡刺史以上妻七貫二  
百五十后妃才人以上同

趙朝事類

隆祐孟太后節儉月供錢千緡而止

宋史



臨江惠歷寺初造輪藏成僧限千錢則轉一匝有營  
妓喪夫家極貧欲轉藏以資冥福累月終不滿一千  
乃攜所聚之錢號泣藏前擲錢拜地輪藏自轉閱寺  
駭異

括異志

開封有老翁長子娶婦別居次子聘某氏未婚適周  
王選宮女女家懼選促男家完娶翁苦貧乃典其身  
于富家得錢以充聘禮新婦入門拜姑而不見翁密  
問之姑漏言焉婦大慟遂取簪珥之屬令人質錢以  
贖翁錢置牀頭期以明日往贖適長婦來具以情告  
長婦不孝而貪乃乘間竊錢去明日婦檢錢無有也

夫疑婦中悔而匿其錢婦不能自明又傷翁無可贖  
乃投環而死夫殮而厝柩他所三日姑令長婦攜簾  
食往祭婦柩雷雨俄作尋聞喚門聲姑問爲誰曰我  
新婦也姑曰爾人耶鬼耶曰新婦人也姑曰爾死已  
三日何由再生婦曰我初如睡夢中神魂飄搖不知  
底止適聞大震一聲不覺身乃在此姑呼婦入室復  
偕隣婦往柩觀之棺蓋已揭長婦踞死於地原錢俱  
在手中

釋史彙編

皇后謁家廟後散付親屬物件有金錢銀錢

武林舊事

霍定遊曲江以千金購人竊貴家亭榭中蘭花自持

往羅綺萊中賣之士女爭買拋擲金錢

曲江春宴錄

黃泳應童子試徽宗命歷見后嬪爭遺以金錢

莆田志

宮中有娠賜物有銀錢三貫足

武林舊事

張窈窕以古錢一枚贈姜叔良色綠青而凸起叔良時置袖間一日忽瑩潤而小凹叔良第謂弄久剝落耳明日則又復青綠凸起矣心甚異之後語窈窕窈窕言同蓋窈窕有二古錢贈一留一留者瑩潤而小凹乃時復類贈者焉自後察之張藏者隻日則青綠而凸姜藏者隻日則瑩潤而凹

志奇

四愁詩美人贈我金錯刀金錯刀王莽錢名

藝苑雌黃

武德四年行開元通寶錢初進樣文德皇后指一甲

痕因鑄之今錢背有文如初月者

謂寶錄

開元錢乃明皇所鑄上有甲痕乃貴妃指迹

青瑣集

青瑣集謂開元通寶錢事由明皇貴妃彼徒見開元字便謂明皇亦不考實之過

錢譜

通鑑考異薛當聖運圖云開元錢係文德皇后甲痕凌璠唐政要錄以爲寶皇后按是時寶后已亡文德未立皆不取涉世錄乃謂開元錢所有爪甲乃錢樣將上貴妃以爪指之帝命勿改故至今有甲痕此說尤妄

考古質疑

開元通寶錢或謂是唐明皇開元中年號所鑄錢背有半月手印文俗謂是楊妃甲痕非也案唐書食貨志武德四年鑄開元通寶錢有司進錢模太穆皇后誤以指甲損其模遂鑄甲文蓋開元者唐高祖所撰錢寶之號非年號也

學林

梁時鑄四銖半錢謂之男錢云佩之即生男也又別鑄除其肉郭謂之公式女錢

鄭樵通志

女錢小錢也

諸史

蘇州北寺鑄彌勒銅像爐方熾一貧女過解少小所佩一錢投之蓋花欄降慶也像成錢現於腹之心中

劉去復見 現果隨錄

唐睿宗女荆山公主出降鑄撒帳金錢每十文繫一

綵絲敕近臣及修文館學士送婚拾錢 言鯖

顧德輝元宮詞月錢常是散千緡大例關支不是恩  
玉堂雅集

禁中鵬月三十日爲大節夜后妃諸閣皆進隨年金  
錢一百二十文 西湖遊覽志餘

七夕錢文爲牽牛織女相對形婦女喜佩之 泉志

王蓮蓮字洛容微有風貌女弟小仙已下數輩皆不  
及但假母有愛錢之癖諸妓皆攫金特甚詣其門者

或酌酢稍不至多被盡留車服儀衛而返

北里志

甌寧王氏事姑孝貧無養天雨錢以給之

大有奇書

厯儉母鑒并得錢千餘萬遂巨富

風俗通

李景讓母王氏孀居嘗值久雨牆圯忽見一槽船實以散錢王氏曰吾聞不勤而獲祿君子所慎乃令婢僕亟掩之

金華子雜編

天聖五年嚴州崇勝院設道場皇太后賜銀三十兩皇太妃施錢二十貫皇妃施錢十貫朱淑儀施錢五

貫

老學庵筆記

宣和用兵厚賜天下緡錢有海州楊秀才妻劉氏寡

居積餘錢十屋劉氏遂請於官以緡錢一百萬獻納以充下戶之輸

春清紀聞

元祐初宣仁太皇太后出妝粉錢重建上清宮

東京記

大定中大長公主降錢三百萬建昊天寺

長安記

鄒呂大者婢所出也其母私畜淨錢萬餘於篋時見空中蛺蝶飛出啟篋視之錢已去七八尚有錢化蛺蝶未成者

見聞錄

毘陵李氏女方年一十六歲頗能詩有拾得破錢詩云半輪殘月掩塵埃依稀猶有開元字想得清光未破時買盡人間不平事

西樵野記



中州女子鄭蘭芬有才名嘗作錢卦

樵窗廢話

賈秋壑侍女與蒼頭兒有情嘗以繡羅錢篋乘暗投之兒亦以玳瑁指盒爲贈後爲同輩所覺同賜死於

西湖斷橋之下

真感記

泰定帝賜壽寧公主鈔五千錠

元史

洪武三十年賜田琛母楊氏鈔四百錠

弁山堂別集

永樂四年賜滿刺國王妃鈔五千貫

賞資考

永樂十年賜夏原吉母鈔二百錠

皇明通記

劉裕起兵討逆同謀孟昶謂妻周氏曰我決當作賊幸早離絕周氏曰君父母在堂欲建大謀豈婦人所

能諫事若不成當于奚官中奉養大家義無歸志也  
起周氏追昶坐曰觀君舉措非謀及婦人者不過  
欲得財物耳指懷中兒示之曰此兒可賣亦當不惜  
遂傾貲以給之

容齋隨筆

王達妻某氏妾嘗辱之不較也或問之曰彼將去矣  
不必較也已而達怒逐之某盡歸其裝一家皆諫止  
之曰此自彼有我何與焉然亦非彼所有也妾遇盜  
盡亡其資

後山談叢

孫皓愛妾使人至市賊奪百姓財物

吳志

阮允之母周氏卒遺財百萬盡歸允姊

負士傳

唐進士趙中立以豪俠耗女商荆十三娘之財荆十三娘殊不介意

劍俠傳

李充兄弟二人妻竊謂充曰妾有私財可分異獨居充跪白其母而遭之婦行泣而去

汝南記

鉛錫之精爲老婢

元中記

唐史卷八十九

奩史卷九十

東吳王初桐于陽簷述

雲間王 昶述庵校刊

蘭麝門

香

宮人蘊蘭麝而披羅綺曰熏服見賈誼新書

丹鉛錄

秦嘉與婦徐淑書曰今奉麝一斤可辟惡氣

太平御覽

王懷之見樹杪嫗披白羅袞亭然虛立還家述之其

女忽變作樹杪鬼狀乃與麝香服之尋復如常

異苑

東昏侯潘妃行處塗地以麝香

齊書

僖宗幸關中道傍之瓜悉皆萎死蓋宮嬪多帶麝香  
所熏遂皆萎落耳 負喧雜錄

鄭注赴河中姬妾帶麝香所過之地瓜盡死 叙小志

趙飛燕爲皇后其女弟在昭陽殿上襪三十五條內  
有青木香沉水香九真雄麝香 西京雜記

王建宮詞添爐欲熬燠衣麝憶得分時不忍燒

合德上飛燕三十五襪飛燕報以沉水香 飛燕外傳

吳隱之罷郡見妻篋中有沉香一片遂取投石門內

水中後人謂之沉香浦亦曰投香浦 太平寰宇記

安南國進皇后方物狀有白檀香十斤梅檀香七十

斤甘梅然香一百斤

天南行記

樂府盧家蘭室桂爲梁中有鬱金蘇合香沈佺期詩

盧家少婦鬱金堂鬱金堂以鬱金然于堂也庾信詩

然香鬱金屋

李義山詩注

李時珍曰與染衣之鬱

唐宮中每行幸卽以鬱金布地

文昌雜錄

左芬鬱金頌云芳草酷烈悅目怡心

左貴嬪集

燕昭王爲舞女二人散荃蕪之香香出波弋國浸地

則土石皆香著朽木腐草莫不鬱茂以薰枯骨則肌

肉皆生以屑噴地厚四五寸使二女舞其上彌日無

跡體輕故也

拾遺記

漢武帝息於延涼室夢李夫人授帝薜蘿之香帝驚起而香氣猶著衣枕歷月不歇帝彌思求終不復見涕泣治席遂改延涼室爲遺芬夢室

拾遺記

荃蘿香婦人帶之彌月芬馥

洞冥記

薜蘿香夫婦佩之則相愛

玉芝堂談薈

張道陵母夢大人自魁星中以薜蘿香授之遂感而孕

誠齋雜記

唐詩情人一去無窮已欲贈懷香恨不逢懷香卽杜

芳亦名薜蘿香見大戴禮注

天祿識餘

晉咸寧中芳蔬園有異菜名芸薇一名芸芝宮人採

帶其莖香氣歷日不散

拾遺記

董姬所熟黃熟香間有梅英半舒荷鵝梨密脾之氣

靜參鼻觀

影梅庵憶語

乳香治婦人血氣

本草拾遺

皇后謁家廟後散付親屬物件有龍涎香

武林舊事

有士人於錢塘江漲橋爲狹斜之游後陷河南不返

其友寄以龍涎香士人酌之云認得吳家心字香玉

窗春夢紫羅囊

能改齋漫錄

交趾貢龍腦香有蟬蠶之狀禁中呼爲瑞龍腦上賜

貴妃十枚妃私發明馳使持三枚遺祿山

明皇雜錄



同昌公主玉香囊中貯辟邪香瑞麝香金鳳香仍雜  
以龍腦金屑每一出遊則所過芬馥

杜陽雜編

小黃女子名觀失其姓與書生喬子曠筆札周旋子  
曠寄觀詩曰美人心共石頭堅翹首佳期空黯然安  
得千金遺侍者一燒鵲腦繡房前志林云鵲腦燒之  
令人相思

林下詩談淮南萬畢術取鵲腦燭雄各一燒之丙寅日入酒中飲令人相思

王廣見一女云是何參軍女年十四而夭爲西王母  
養使與下士人交廣與之纏綿其日於席上得手巾  
裹鷄舌香其母取巾燒之乃是火浣布

續搜神記

元宗爲太子時愛妾號鸞兒多從中貴處逍遙微行

以輕羅造梨花散藥裏以月麟香號袖裏春所至暗遺之

史諱錄

文帝迎靈芸道側燒石葉之香

拾遺記

西王母降燒兜末香

漢武故事

祖法兒婦女皆以沉檀掩人兒諸香熏衣所過街市香經時不散

明史

袁運嘗以奇香一丸與莊姬藏於笥終歲潤澤香達於外其冬閣中諸蟲不死冒寒而鳴姬以告袁袁曰此香製自宮中其間當有返魂乎

真率齋筆記

漢武夕坐有神女至散明天發日之香

漢武故事

同昌公主薨焚升霄降靈之香

杜陽雜編

夢得香物婦女歸也

緯畧引夢書

秦嘉與婦徐淑書曰今奉好香四種各一斤芬芳可  
以覆身淑答書未侍帷帳則芬芳不覆

太平御覽

王氏妻葬有年後開墓香火猶燃

述征記

后始加大號婕妤上二十六物使侍兒郭語瓊拜上

內有龍香握魚二首通香虎皮檀象一座

飛燕外傳

王雙每獨寢卽有一女子來就之常以一奩香見遺  
氣甚清芬後發薦見一大蚯蚓斃之奩乃螺殼香則

菖蒲根

異苑

齊潘妃殿內有和香香氣芬馥聞之使人歡悅生諸

雅態

金樓子

唐號韓秦三國夫人朝天曾有人俯身一窺其車香

氣數日不絕

海蠡編

玉女擎玉爐焚九和之香

三洞珠囊

郭元振婢妾十人宴罷散九和握香

讀書偶然錄

西王母降燔百和之香

漢武帝內傳

刀圭第一香蓋咸通所製賜同昌公主者酷烈清妙

雖焚豆大亦終日旖旎

清異錄

宋光宗妃合和奇香號東閣雲頭香

香乘

徐鉉姬妾月夜露坐燕佳香一炷號伴月香

江南錄

燕城婦女夜遊其前令一人持香辟人名辟人香

歲時

記

明皇正寵妃子安祿山進助情花香百粒大小如稗米而色紅每當寢處之際則含香一粒助情發興筋力不倦帝祕之曰此漢之慎郎膠也

開元天寶遺事

同昌公主有辟寒香外國所貢大寒焚之煖氣烘然人皆減衣

述異記

宮中媚香號化樓臺

徵文玉井

意可香初名宜愛或云此江南宮中香有美人字曰

宜愛此香故名宜愛山谷曰香殊不凡而名乃有脂粉氣易名意可

珍珠船

金日磾既入侍欲衣服香潔自合奇香由是宮人皆用薰衣香以增其媚

事文玉屑

緬俗婦人不施胭脂惟和白檀麝香當歸姜黃末傅於身及頭面以爲奇

香嚴三昧

婦人夜夢鬼交安息香同臭黃燒熏丹穴

海藥本草

縉雲令李長卿女慧性過人染疾而逝殯於仙巖寺後有曹穎來館其東一夕有女子打扇而至與語皆出塵氣穎詰其姓氏曰姓李名萼字英華知子鰥居

故來相慰倡和無虛日曹有親陳觀察挽之從軍將就道英華與訣曰妾與君之緣斷矣君他日當有兵難敬授靈香一瓣有急當爇以告當陰有所護及曹獲譴麾下追惟英華之言欲取所遺香爇之軍行無宿火卒正法

耆舊續聞

孫亮愛姬四人皆絕色一名朝妹二名麗居三名洛珍四名潔華爲四人合四氣香此香異國所出香氣沾衣歷年彌盛百浣不歇因名百濯香或以人名香故有朝妹香麗居香洛珍香潔華香亮每遊四人同輿以香名前後爲次所居室名思香媚寢

拾遺記

卞山有無價香一老母拾得文石光可玩偶墜火中  
異香聞於遠近收而寶之

天中記

解州俞保補戍騰越妻王氏將粒米作信香日夕懇  
禱關聖祠歲餘保在伍夢關聖呼曰爾婦爲汝虔禱  
故來視爾爾欲歸乎保伏地願歸已不覺隨其馬蹄  
馳行獵獵猛風吹送有聲已落平沙柳林中識是解  
州城外因抵家叩門王氏始疑保具道所以方啟戶  
相抱痛哭隨詣廟謝明日復詣州言狀移文騰越察  
之稱保離伍僅一日而軍籍後有關聖免勾四字保  
遂得免王氏有詩曰信香一粒米客路萬重山一香



一點淚流恨入蕭關

耳談

真西洋香方董姬手製百丸誠閨中異品有一種名蓬萊香久烝衾枕間和以肌香甜艷非常夢魂俱適

影梅庵憶語

吳王遣美人採香於香山有採香徑

吳地記

河伯少女常市香於蔡天生

真諦

韓熙載令諸姬對花焚香著五宜說木犀宜龍腦酥

蘇宜沉水蘭宜四絕含笑宜麝蘅荀宜檀

香史

侍臣入直賜青綾被妙選侍女五夜添香唐詩春風

侍女護朝衣又侍女新添五夜香

丹鉛總錄

和凝詞幾度試香纖手煖

紅葉稿

端溪陸氏妾善司香字曰香東

本事詩

內宮有所禱賜香於天竺大士

朝野類要

賈充女聰慧過人時韓壽美姿容充辟以爲掾充每聚會賓客賈女於青瑣中見壽說之恒懷存想後婢往壽家具述之并言女光麗壽聞心動遂請婢潛修音問及期往宿壽躡捷絕人踰牆而入家中莫知自是充覺女盛自拂拭後會諸吏聞壽有奇香之氣是外國所貢一著人則歷月不歇充計武帝唯賜已及陳騫餘家無此香疑壽與女通而垣牆重密門閣急

峻何由得爾乃托言有盜令人修牆使反曰其餘無異唯東北角如有人跡而牆高非人所踰充乃取女諸婢考問卽以狀對充秘之以女妻壽

世說新語

陳壽以韓壽爲椽每會聞壽有異香氣是外國所貢鴛計武帝惟賜已及賈充他家無此香嫌壽與已女通考問左右婢具以實對壽以女妻壽

郭子

太祖顧命曰餘香可分與諸夫人

郭都故事

唐時內人各攜名香比試優劣名曰鬪香

香乘

有書生幼時貧賤每爲人侮害極其悲憤一日閒步經觀音里行一婦人姿甚美生屢回顧之有惡少年

數人於路相謂此婦有邪行生聞賤之不復有相顧  
意生後與妻坐燭下偶及此事妻曰此吾異姓之從  
女弟也聞其獨與一侍兒居立身最高潔何等惡少  
年汙穢之也生聞之大怒欲爲報之翌日婦侍兒來  
曰主母感郎君恩卽爲郎君死無恨幸與郎君有夙  
緣後口可一見於某所第未可嚮邇盡歡有日也生  
如期往果得望見各以目逆之翼日侍兒復至曰主  
母治杯醴屈郎君少坐及至酒饌甚盛几筵所陳器  
皆人間所無獨命生坐中堂飲半侍兒負一革囊至  
曰主母所命也啟視則人頭數個顏色未變乃向侮

害生者也生驚欲避去侍兒曰郎君請無驚必不相累主母固預命以藥物待之矣懷中出少藥用小指甲每頭彈斷處粟米許頭漸縮小至於李子大侍兒食之吐核亦李也侍兒又曰主母惡少年無須臾忘亦欲假手於郎君生愧謝弗能婦人又命侍兒進一香丸曰不勞君舉腕君第掃淨室夜坐焚此香於爐香烟所至君急隨之卽得志矣有所獲須將納於革囊歸勿畏也生如指焚香隨烟而往初不覺有牆壁碍行處皆有光亦不類闇夜每至一處烟嫋嫋繞惡少年頸三繞而頭自落生悉以頭納革囊中於是烟

復嫋嫋而旋生復隨而返到家未三鼓也烟復收火  
已寒矣探之其香變成金色圓若彈倏然飛去鏗鏗  
有聲生恐婦復須此物無以復命正惶急侍兒不由  
門戶忽爾在前取頭彈藥食之生告曰香丸飛去奈  
何侍兒曰得之久矣主母傳語郎君此畏關也此關  
一過無所不可爲始了天下事共作神仙也後生與  
婦俱徙去不知所之

女紅餘志

王珪宮詞暗花香印錦紋頭

甘棠妓溫琬賦香篆云還同薄命增惆悵萬轉千回

不自由

青瑣高議

奎史卷九十

舊史卷九十一

東吳王初桐子陽篲述

茂苑宋思仁雲亭校刊

蘭麝門

香器

李煜僞長秋周氏居柔儀殿有主香宮女其焚香之  
器曰把子蓮三雲鳳折腰獅子小三神卅字金鳳日  
嬰玉太古容華鼎凡數十種金玉爲之

清異錄

閨人燒香器有有鎖者李商隱詩鎖香金屈戌又金  
蟾齧鎖燒香入

研北雜志



陶宏景母郝氏夢天人手執香爐至其所因有娠

南史

隋煬帝每行幸令宮人擎香爐在輦前行嬪妃皆遙

辨香氣以知恩澤

南部烟花記

懿德皇后回心院詞燕熏爐待君娛

焚椒錄

黃帝有博山香爐蓋西王母遣帝者

事物紀原

泰元中皇太子納妃王氏有銀塗博山蓮槃三斗香

爐一銅博山香爐十

東宮舊事

趙飛燕爲皇后其女弟在昭陽殿上襪三十五條內

有玉層金博山香爐

西京雜記

趙昭儀作九層博山香爐鑲爲奇禽怪獸窮諸靈異

皆自然運動

西京雜記

漢成帝賜飛燕赤金九層博山香爐

飛燕外集

昭儀作卧褥香爐一名被中香爐爲機環轉運四周而爐體常平可置之褥被

西京雜記

后始加大號燒好上二十六物以賀內有紫金被褥

香爐三枚

飛燕外傳

楊玉香有文燕香爐

瑣憶纖志

宋玉賢既稟女質厥志彌高年及笄應適許氏密具法服既至夫門更著黃金裙手執鵲尾香爐不親婦禮夫家力不能屈乃聽出家

香譜

劉夢鼎母夢羽人捧三足香爐至其家遂孕

崇安縣志

安樂公主造百寶香爐高三尺開四門絳橋勾欄花草飛禽走獸諸天妓樂麒麟鸞鳳白鶴飛仙絲來線去鬼出神入隱起鍛鏤窈窕似媚真珠瑪瑙瑠璃琥珀玻璃珊瑚琤琮琬琰一切寶具

朝野僉載

石虎御女爲複帳四角安純金銀鑿鏤香爐

鄴中記

太子屬疾宮人誤觸金香爐仆地有聲太子驚悸轉劇

建炎以來朝野雜記

皇后餞衛有金香爐一

明會典

貴人公主有純銀香爐四枚銅香爐三十枚

魏武上雜物疏

庾仲文嫁女具銅香爐四人舉乃勝

南史

娶婦車前用銅香爐二

徐爰家儀

大食窯以銅作身用藥燒成五色如香爐合兒之類

最宜婦人閨閣中用

格古要論

司馬相如美人賦金鉏熏香注云香球也意卽西京

雜記所云褥爐也

天祿識餘

李清照詞玉鴨熏爐間瑞瑤

漱玉集

客氏轎前提爐數對燃沉香如霧

酌中志畧

唐制宮人用玉龜藏香

天祿識餘

宋宮中導從有女冠二人執香鑪香盤

大明集禮

皇后儀衛有金香合一

明會典

古者婦始見舅姑持香纓以拜五色采爲之隋牛宏  
議以素絹八尺中擗名曰帛拜以代香纓

事始

禮記女子許嫁纓纓有二一少時所佩內則云女子  
未笄給纓一許嫁時所繫昏禮士人親脫婦纓鄭注  
婦人十五許嫁笄而禮之因著纓

天祿識餘

爾雅婦人之褱謂之縞注卽今之香纓

天香樓偶得

史良妤一女子許嫁而朱果良怒殺之夜夢見曰還

君物覺而得昔所與香纓金釵之屬

搜神記

京師官子張生元宵遊乾明寺拾得紅綃帕裏一香

囊有細書絕句詩詩尾書曰有情者若得此欲與妾  
一面請來年燈節於相藍後門車前有雙鴛鴦燈者  
是也生如期往候果見雕輪繡轂掛鴛鴦燈一盞乃  
誦詩於車後女遂令尼約生次日與之歡合生問之  
女告曰妾乃節度使李侍妾李公老適誤妾芳年遂  
與侍婢彩雲隨生逃隱姑蘇偕老

玉芝堂談薈

文文山歐陽夫人疾問浣婢索衣上舊香囊云此落  
齒時得之父母者也吾死必懸吾心前

紀年錄

劉盼春者汴梁樂工女年十八與汴人周恭定情恭  
父嚴禁之盼春杜門謝客有雲間富商齎金帛往母

欲奪其志不從痛加箠楚恭知之致書使從母命綴  
一小詞云阻佳期盼佳期欲寄鸞箋雁字稀新詞和  
淚題怕分離又分離無限相思訴與誰此情風月知  
盼春得詞投繯死及火其尸餘燼悉焚獨所佩香囊  
鮮好發之中藏恭詞簡一紙宛然如故周藩誠齋爲  
傳奇曰香囊怨

青泥蓮花記

繁欽定情詩何以致叩叩香囊繫肘後

樂苑

白居易詩拂胷輕粉絮煖手小香囊

長慶集

一人爲河伯邀去謂云小女聰明欲以給君箕帚卽  
有數十青衣捧一女郎出年可十八九姿容婉媚便

成婚三日後敕云當發遣去女郎以金甌麝香囊與

壻泣涕而別又與錢十萬藥方三卷

法苑珠林

宋宮人採玫瑰花雜腦麝作香囊氣甚清馥

花史

端午賜后妃經筒香囊軟香龍涎佩帶

乾淳歲時記

同昌公主帶玉香囊

杜陽雜編

淳熙十一年進太皇后物內有真珠香囊

乾淳起居注

明皇夢一小鬼竊太真紫香囊

沈括補筆談

貴妃初瘞馬嵬至德二年上皇令中官移葬肌膚已

消釋矣胷前猶有錦香囊在焉中官以獻上皇置之

懷袖

太真外傳



肅宗時詔令改葬太真惟高力士知其所瘞在馬嵬坡驛西北十餘步當時但以紫褥而乏之及改葬之時皆已朽壞惟有冑前紫綃香囊中尙得水麝香持以進上皇泣而佩之

津陽門詩注

非煙武公業愛妾比隣趙象於陳中窺見之發狂心蕩乃取薛濤牋題絕句密緘之祈門媼達非烟烟酌篇寫於金鳳牋封付門媼令遺象象啟緘吟諷數四拊掌喜曰吾事諧矣又以剡溪玉葉紙題詩以謝句日門媼復來因授象以連蟬錦香囊并碧苔牋詩象結錦囊於懷乃剪烏絲闌爲回簡

步非烟傳

梁閨老妓英奴以麗水囊貯香遊九星院中花木皆  
枯增葉侍兒小名錄

范寬之得妓人結絲合歡香囊寄詞云謝娘梳子買

妃英佩比紅兒詩話

高觀國詞合字香囊半影金竹屋癡語

神龜元年皇太后遣大比丘惠生向西域取經太后

敕付香袋百五枚洛陽伽藍記

京師承平時宗室戚里歲時入禁中婦女上犢車皆  
用二小鬟持香毬在旁而袖中又自持兩小香毬車  
馳過香烟如雲數里不絕塵土皆香老學庵筆記

香珠以泥香捏成貫以絲絲婦人好帶之

桂海虞衡志

葉統統有詠香撲詞

愁言

舊唐書卷九十二

東吳王初桐于陽

華述

懷寧余鵬年伯扶校刊

花木門

花

維摩室有一天女見諸天人聞所說法便現其身卽以天花散諸菩薩爲供養

維摩詰經

天帝令玉女以天花散諸菩薩悉皆墮落惟塵劫未盡者沾身不落

淨土指南

秦少遊宿廬山宮亭湖廟下夜夢美人自言維摩詰

散花天女也 冷齋夜話

竭父國城門樓上大張幃幕夫人采女皆在其中王  
入城時夫人采女散衆花紛紛而下 佛國記

揚州瓊花天下惟一本后土夫人司之 中興集

迎輦花卽洛陽所進合蒂花也煬帝令袁寶兒持之  
號曰司花女 南部烟花記

鶴林寺杜鵑花最盛每春末爛漫時有女子紅裳艷  
妝遊花下蓋花神也道人殷七七九月初七日宿寺  
中中夜女子來曰妾司此花今爲道者開之明日花

葉重九日大開如春時 續仙傳

武后將遊上苑宣詔曰明朝遊上苑火急報春知花

須連夜發莫待曉風吹殘晨百花盡開

卓異記

白樂天之母因看花墮井

前部新書

葉夫人嘗注水給洗水中忽現梅菊水仙花夫人喜

祝曰願見蓮花質明蓮花如畫

梅花草堂筆談

筆洞細君花殿最一卷薛素素花瑣事一卷

然脂集

文俶有惜花美人圖

啟禎野乘

曼殊生時母夢鄰姬以白花一當使賣奶奶廟

西河合集

女學士王賽玉小字儒卿名玉兒行六花當紫微女

太史楊璆姬小字婆喜名新勻行二當蓮花女狀元

蔣蘭玉小字雙雙名淑芳行四當杏花女接眼齊愛  
春小字愛兒名淑芳行五當桃花女探花姜賓竹小  
字玉兒名如真行八當西府海棠女會元徐瓊英小  
字愛兒名文賓行三當梅花女會魁趙連城小字延  
齡名彩鴛行五當芍藥女會魁陳玉英小字八十兒  
名士蘭行八當繡毬女解元陳文妹小字回兒名素  
芳行五當桂花女經魁張如英小字奴兒名友真行  
五當芙蓉女經魁蔣文仙小字耐經名嫖屏行五當  
葵花儲材陳瓊姬小字芳春行十當蕙草儲材玉蕊  
梅名賓儒行一當芝草

蓮臺仙會品

余嘗評花以爲杏有閨門之態桃如倚門市娼李如  
東郭貧女 三柳軒雜識

花之有使令猶中宮之有嬪御閨房之有妾媵也梅  
花以迎春瑞香山茶爲婢海棠以蘋婆林檎丁香爲  
婢牡丹以玫瑰薔薇木香爲婢芍藥以鴛粟蜀葵爲  
婢石榴以紫薇大紅千葉木槿爲婢蓮花以山礬玉  
簪爲婢木犀以芙蓉爲婢菊以黃白山茶秋海棠爲  
婢蠟梅以水仙爲婢諸婢姿態各盛一時濃淡雅俗  
亦有品評水仙神骨清絕織女之梁玉清也山茶鮮  
妍瑞香芬烈玫瑰旖旎芙蓉明艷石氏之翔風羊家



之淨琬也林檎蘋婆姿媚可人潘生之解愁也鷺粟  
蜀葵妍于籬落司空圖之鸞臺也山礬潔而逸有林  
下風魚元機之綠翹也黃白茶韻勝其姿郭將軍之  
春風也丁香瘦玉簪寒秋海棠嬌然有酸態鄧康成  
崔秀才之侍兒也

瓶史

崔元微春夜獨處有女伴過曰姓楊氏李氏陶氏一  
緋衣小女曰姓石名阿措坐未定報封家十八姨來  
命酒各歌以送之言辭泠泠有林下風色皆殊絕芳  
香襲人十八姨持盞翻酒污阿措衣阿措拂衣而起  
十八姨曰小娘子弄酒皆起至門外別明夜又來阿

措曰諸女伴皆住苑中每歲被惡風所撓常求十八  
娘相庇昨阿措不能依回應難取力處士見庇必有  
微報請作一朱簾上圖日月五星之文二月一日于  
苑東立之處士依言立簾是日東風振地苑中繁花  
不動乃悟諸女皆衆花之精阿措卽安石榴封十八  
姨乃風神也後數夜諸女來謝各裹桃李花數斗勸  
崔生服之可延年却老

博異記

李瑛郊居一日見雙鬟冉冉而來高髻靚妝色甚殊  
艷迎謂瑛曰娘子傳語卽君特來相候俄而青衣持  
茵席帷帳陳設堂中珠玉輝映異香滿室忽繡車一

乘一美人年可十六七丰姿綽約降車入門與漢相  
見瑛甚疑懼美人遽命從者設饌杯皿食物皆非人  
間所有酒再行語稍款洽瑛因問女即何來美人曰  
吾洛陽花神也謁紫院妃歸見此地名花欲與君作  
半日清玩耳當此雅叙何惜一詩命雙鬟進碧羅箋  
瑛卽賦一絕美人辭去引燭升車未數十步恍惚而  
沒

三徑

唐開元錄 瑛園雜志曰花神姓宓號臘之

梅妃莆田人開元中高力士使閩粵選歸侍明皇大  
見寵幸淡妝雅服姿態明秀筆不可描畫性喜梅所  
居闥檻悉植數株榜曰梅亭梅開賦賞至夜分尚顧

戀花下不能去上以其所好戲名曰梅妃

梅妃傳

南華夫人封梅爲寄春君

女紅餘志

僞吳從嘉嘗於梅花間用銷金羅爲亭與愛姬花氏  
對酌其中

花史

璿光殿梅花昭惠后手植

南唐書

袁豐之宅後有梅花六株盛開嘆曰冰姿玉骨世外  
佳人但恨無傾城笑耳即使妓秋蟾出比之乃云可  
與並驅爭先

桂林記

吳縣王氏女母夢女童授梅花而生

山居新錄

董姬於梅花含蕊時先相枝之橫斜與几上軍持相

受至花放卽採入供使令韻幽香恒霏微于曲房斗室

影梅菴憶語

美人淡妝簪戴此花之宜稱也妙妓淡妝雅歌此花之榮寵也

梅品

上林有趙昭儀所植同心梅疑是鴛鴦梅

盤洲集

趙師雄遊羅浮日暮見美人淡妝素服出遊因與醉寢東方既白起視乃在梅花樹下翠羽啾嘈月落參橫但惆悵而已美人蓋梅花神也

龍城錄

有一女人性愛梅後遂變爲梅樹

顧樸禪師語錄

吳下女子葛秀英字玉貞母夢吞梅花而生幼時有

老尼見而驚曰此青元宮道真女也

隨園詩話補遺

揚州太守園中有杏數十株每至爛開張大宴一株  
令一妓倚其傍名其館曰爭春宴罷夜闌人聞花有  
嘆聲

揚州事迹

李冠卿所居堂前杏一株花多而不實適有一媒姥  
曰來春與嫁了此杏冬深忽攜酒一樽來云是婚家  
撞門酒索處子裙一腰繫杏上已而奠酒祝辭家人  
莫不笑之來春此杏結子無數

文昌雜錄

北齊盧士琛妻崔氏春日以桃花和雪與兒醺面呪  
曰取桃花取白雪與兒洗面作光悅取白雪取桃花

與兒洗面作妍華取花紅取雪白與兒洗面作光澤

取雪白取花紅與兒洗面作華容

湘烟錄

千葉桃花盛開帝與貴妃日逐宴于樹下

開元天寶遺事

桃花陰乾爲末服之令婦人美容顏

居家宜忌

杜子美母名海棠故子美不作海棠詩

王禹偁詩話

蜀潘炕有嬖妾解愁姓趙氏其母夢吞海棠花藥而

生見外史檮杌

海棠譜

范烈女許字未婚而夫死女聞卽自縊庭前有海棠

一株方開甚穠艷女死花忽變白

揮塵新談

宋璧母喪海棠花變白色因呼孝棠

宋氏詩冊

垂絲海棠一名醉美人

竹齋詩餘

重葉海棠爲花命婦

牡丹榮辱志

昔有婦人思所歡不見恒灑淚于北牆之下後灑處生草其花甚媚色如婦面其葉正綠反紅秋開名斷腸花又名八月春卽今秋海棠也

採蘭雜志

秋海棠嬌冶柔軟真同美人倦妝

尊生八牋

海棠肖美人秋海棠更肖美人春花肖美人之已嫁者秋花肖美人之待年者春花肖美人之綽約可愛者秋花肖美人之纖弱可憐者

閒情偶寄

張學典字古政張佚女也所刻秋海棠唱和小箋別



有一種憨稚之態

秋海棠小譜

錢塘閨秀陳汝凝餽妹氏秋海棠啟云玉露滯庭金  
風肅砌砧杵動授衣之念梧桐驚一葉之凋時有海  
棠嬌處牆陰芳姿可擷甘居牖北幽質獨妍伴淮南  
之叢桂暫倩香魂候彭澤之黃花先舒逸態漢官秋  
冷猶然春睡嬌痴隋苑喬妝曾似天生嫵媚見茲尤  
物諒必同憐聊移數本以助淡妝亟置香閨何勞夜

燭

玉塵集

無瑕嘗著素桂棠折桂明年開花潔白如玉女伴折  
取簪髻號無瑕玉花

花史

石亭舟次綏德河聞一女子訴流啼哭有命拯之容  
貌妍絕問之曰姓桂名芳華遂納爲副室凡相親愛  
者輒令出見芳華亦無難色後于謙至其第呼芳  
華出見竟不出亭欲斬之芳華走入壁中語曰妾乃  
一古桂久竊日月精華故成人耳于公社稷之器安  
敢輕諸妾于此永別矣

西樵野記

狄明善見酒肆中一女甚美云姓桂名淑芳相與就  
寢極其縑繡歡歡而別明年秋復往訪之杳無消息  
惟一老桂花耳

北墅抱瓮錄

杜鵑卽映山紅又名紅躑躅王建宮詞云太儀前日

暖房來囑向昭陽乞藥裁勅賜一窠紅躑躅謝恩未  
了奏花開其重如此 客房隨筆

崔秀玉詠杜鵑花云恰喜花名似鳥名 軌佳閣集

詩曰木蘭開遍女郎花 牧樓記

唐人謂辛夷爲女郎花 劍南詩案

秦約有辛夷仕女圖詩 歷代吟譜

丁香有麝大如山茱萸者謂之女丁香 本草蒙筌

唐昌觀玉蕊花乃唐昌公主所植 玉蕊辨証

昔有黃氏女遺落髮插紅瓣遂生山丹花 臺海采風

紫微王夫人詩仰掇碧柰花 真誥

徐排妻劉三娘摘同心梔子贈謝娘詩云同心何處

恨梔子最關人

玉臺新詠

梁武帝女爲尼于浮槎山建道林寺寺有榴花卽帝

女手植

方輿勝覽

北齊安德王新納妃母宋氏薦二石榴于帝前石榴

房中多子欲子孫衆多也

海錄碎事

七聖殿繞殿石榴皆太真妃手植

洪氏雜俎

端午賜后妃諸閣翠葉五色葵榴

乾淳歲時記

新羅女主德曼最明敏唐太宗遣使遺牡丹花圖并  
花子德曼曰此花絕艷而畫無蜂蝶是必無香種其

子果然

朝鮮使署

女弟子舞隊有佳人剪牡丹

宋史樂志

王富英儒家女也其母夢吞牡丹花而生

香祖筆記

洗妝紅如美人洗去朱粉見天真之肌

洛陽牡丹記

醉西施粉白花中間紅暈狀如酡顏

天彭牡丹譜

牡丹有楊妃沉醉飛燕紅妝肉西施香西施

亳州牡丹表

牡丹有名雪夫人者

清異錄

上官昭容詠雙頭牡丹詩云勢如連壁友心似嗅蘭

人唐詩紀事

許彥周詩話曰昭容雙頭牡丹一聯計之必一英奇女子也龍城錄曰雙頭牡丹詩惟

上官昭容一聯絕麗

顧德輝元宮詞各宮分賜牡丹叢

草堂雅集

紫姑神賦一捻紅牡丹詞甚工

詞綜

鄭翰卿畫夢黃衣少年要至廡下共飲少焉一麗人  
至少年自起舞歌春遊之曲云芳草多情王孫未歸  
遲我良朋東風吹衣次及麗人作迎風之舞歌春愁  
之曲云金衣公子話春愁幾度留春更不留昨日漫  
天吹柳絮玉人從此嬾登樓飲正歡少年駭曰文羌  
校尉來矣見一人綠袍張目至前遂罷席而寤起視  
庭中牡丹一花映日婉媚一黃蝶猶未去則少年也  
一螳螂長二寸集葉上是爲文羌校尉麗人則牡丹

花神云 靜志居詩話

明皇宿酒初醒凭妃子肩同看木芍藥上親折一枝

與妃子遞嗅曰此花香艷能醒酒 開元天寶遺事

芍藥一名將離故鄭之士女取以相贈 妝樓記

盧儲迎內子至官舍芍藥正開因題詩曰芍藥斬新

栽當庭數朵開東風與拘束留待細君來 南唐新書

芍藥有醉西施有觀音紅 芍藥譜

十姊妹一蓓十花又有七朵一蓓者名七姊妹 草花譜

陳後主與張麗華遊後園有柳絮點衣麗華曰何事

點人衣後主曰輕薄物也麗華笑而不答 詩學事類

元宗幸連昌見楊花點妃子衣曰似解人意

花史

寡婦樹蘭生而不芳

晏子

蘭侍女子同種則香故名侍女

妝樓記

南華夫人封蘭爲世愛君

女紅餘志

蘭爲女子之事女子喜佩之一名女蘭

女士殿最

英妃在檀芽降撫長琴歌怨蘭花曲其辭曰人間一

別下視微茫蘭花發色在彼閒房自離妾手懼其弗

芳蘭乎蘭乎展不可忘

修真錄

梅妃有蘭花賦

梅妃傳

是采閣中蘭花始發其姑命目之采應聲曰懸于谷



底顯于濃澤貴比于白玉重比于黃金既入燕姬之夢還鳴宋玉之琴

內觀日疏

全州赤蘭亭前有合抱二大松上生草如寄生葉似建蘭花開赤色香聞數里相傳此松乃楊六郎夫人手植赤蘭其靈跡也

粵西偶記

寶兒每夜採水仙花一跽覆裙襦其上詰朝服以見帝帝謂之肉身水仙

花史

明皇賜虢國夫人紅水仙十二盆盆皆金玉七寶所造

明皇雜錄

姚姦夢觀星墜地化爲水仙花一叢摘食之覺而產

女長而令淑有文因以名焉觀星卽女史故水仙名

女史花又名姚女花

內觀日疏

謝夫人母夢一仙女界水仙花明日生夫人

喻林

薛稷于窗櫺內閑窺見一女子獨步中庭嘆曰良人  
遊學難于會面對此風景能無悵然于袖中出一畫  
蘭卷子對之微笑復淚下吟詩聞有人聲遂隱于水  
仙花下忽一男子從叢蘭中出曰娘子久離必應相  
念阻于跬步不啻萬里亦歌詩二篇歌已仍入叢蘭  
中一時謂二花爲夫婦花

山樵暇語

太液池千葉白蓮盛開明皇與左右嘆羨久之帝指

貴妃示于左右曰爭如吾解語花

開元天寶遺事

王夫人夢一僧手持蓮花令摘五葉倒之後生五子

皆貴顯

相陰舊事

大名民家有男女私情不遂赴水死後三日二屍相

攜而出是歲此陂荷花無不並蒂

敬齋集

雙頭蓮一名催生草婦人難產左手把之即生

本草綱目

淋池植分枝荷一名低光花葉芬馥食之口氣常香

宮人貴之遊宴出入必皆含嚼

拾遺記

趙飛燕爲皇后其女弟在昭陽殿上襪三十五條肉

有獨搖寶蓮一鋪

西京雜記

浣花女詠芙蓉云芙蓉花發滿江紅盡道芙蓉勝妾

容昨日妾從隄上過如何人不看芙蓉

顧氏積書巖選

晉傳統妻有菊花頌

花史

女節女華菊花名也

崔實月令

古有女子與人約曰秋以爲期至上冬猶未相從其  
人使謂之曰菊花枯矣秋期若何女曰雖枯要當更  
生明日菊更生蕊因名菊爲更生花

金剛鑽

董姬愛菊尤愛剪桃紅每晚高燒翠燭圍六曲鏡屏

設小座於花間位置菊影極其參橫妙麗始以身入

菊菊與人俱在影中

影梅庵憶語

楊妃菊菊之柔媚爲悅者也淑卿詠楊妃菊云霓裳  
舞罷小腰肢低首臨風幾許思莫怪姿容太妖冶半  
緣卯酒半臙脂

說聽

曹太虛見大黃菊當心生一紅子漸大三日若櫻桃  
焉有隣女周少夫者年十六同女伴來看竟摘食之  
忽乘風飛去太虛驚報其家父母姊妹向天號哭初  
不反顧自首及足漸没于青天之中

元虛子仙志

中秋夜女人手下驚粟子明年花盛

花譜

禾中產鶯粟相傳八月十五夜俾女郎解衣播種則

花倍繁

倦圃蒔植記

項王美人名虞葬處生草能舞人呼虞美人草

碧雞漫志

延毅新志俗云舜母傳會殊謬

虞美人草唱虞美人曲則應拍而舞

益州草木記

曾子宣夫人魏氏有虞美人草行

詩話總龜

張恭人玉簪花詩云落枕無聲但有香

南野堂筆記

珠江南岸爲莊頭村家以莖素馨爲業多至一二百

畝昔南漢劉鋹有美人小字素馨者居此故其植獨

繁而芬芳酷烈亦勝他所是曰花田

龜山志

金鳳花宮闈娛語謂之鳳兒花光宗李后之生有鸞

鸞來儀名曰鳳娘迨正坤極六宮避之呼金鳳花爲

好女兒花

四朝聞見錄

宋史云后生有黑鳳來集

謝長裾夫人見鳳仙花命侍兒進金膏以壓尾梢染

膏灑之折一枝插倒影三山環側明年此花金色不

去至今有班點若灑者名倒影花

花塵

水木犀花一名指甲花染指甲紅於鳳仙

尊生八牋

七里香一名指甲花搗其葉染指甲甚紅

廣群芳譜

鄭榮作金錢花詩夢一紅裳女子擲錢與之曰爲君

潤筆及覺探懷中得花數朵遂呼爲潤筆花

國老談苑

青浦周士亨江有年九月往渭塘泊舟一樓下樓上

二女一白面一紅顏倚窗笑語周江仰視間漫賦一

詩二女曰舟中有詩樓上豈無詩乎遂朗吟二韵乃  
以蓮房藕梢俯擲生舟兩人共起欲登樓躡之恍惚  
不見但見蘆花白蓼花紅耳

續柳編

金陵女子周燕見諸姊作假花戲題云鏤花雕葉百  
般新巧手分明遂奪真

雲巢集



舊唐書卷九十二